

# UA Repository

## Child Maltreatment and Children's Human Capabilities in Aruba.

Item Type	A1 Article
Authors	Eugene, Clementia;Graafsma, L. G.;Sanches, M.
Citation	Eugene, C., Graafsma, L. G., Sanches, M. (2022). Child Maltreatment and Children's Human Capabilities in Aruba. Caribbean Journal of Psychology 15(2). pp. 92-131.
DOI	<a href="https://hdl.handle.net/20.500.14473/979">0.37234/CJP.2022.1502.A004</a>
Publisher	The University of the West Indies Press
Download date	2026-03-15 20:04:28
Link to Item	<a href="https://hdl.handle.net/20.500.14473/979">https://hdl.handle.net/20.500.14473/979</a>

## Abuso y e Capacidad Humano di Mucha na Aruba

E nivel di abuso di mucha na Aruba ta halto, y e miho forma pa atende e problema aki ta pa aplica e *Human Capability Approach* (HCA). Asina a argumenta un investigado di Universidad di Aruba, Clementia Eugene, hunto cu academiconan di Universidad di Surnam, Tobi Graafsma y Manon Sanches. Esaki ta e prome biaha cu e relacion entre abuso di mucha y e acercamento di Capacidad Humano, HCA, a wordo forma den un teoria. Ademá, e teoria a wordo publica den e *Caribbean Journal of Psychology*.

E tres academiconan no solamente a haci un investigacion di e tiponan di abuso di mucha, pero tambe a analisa nan a base di e 10 Capacidadnan Central di Humano proponi door di filosofonan Martha Nussbaum y Amartya Sen. E 10 Capacidadnan ta inclui bida, salud, integridad fisico y siguridad, sentido, imaginacion y pensamiento, emocion, rasonamento practico, afiliacion, otro especie, hungamento, y control riba e medioambiente personal. E contribucion principal di HCA pa desaroyo humano ta e cambio di modelo economico popular di desaroyo, manera Producto Interno Bruto (GDP), cu ta enfoca riba entrada, rikesa, y mercado liber, pa uno cu ta midi calidad di bida y bienestar di hende. E rasonamento ta cu rendimiento ta un logro, mientras cu capacidad ta e potencial pa logra. Funcionamento ta mas directamente relaciona cu condicionnan di bida, mientras cu capacidad ta mara na e nocion di libertad y e oportunidadnan real disponibel pa e bida cu un hende ta hiba.

E definicion principal di HCA ta desaroyo como libertad. E ta nifica e expansion di libertad di hende como miembro di sociedad. E motibo pa kere cu HCA por aplica na muchanan tambe ta pasobra estudionan a muestra cu den e cuadro di abuso, no tur mayor tin e capacidad pa tuma e decisionnan correcto den lanta nan yiunan. Ademá, muchanan tin e habilidad pa auto-determina nan desaroyo segun nan ta transiciona di un etapa pa e siguiente, por ehempel, pa medio di actividad escolar y proyectonan comunitario durante cual nan por haya oportunidadnan pa expresa nan opinion y asina empodera nan mes y influencia e mundo rond di nan. Mirando nan dependencia legal y economico riba nan mayornan, ademá di nan vulnerabilidad fisico y emocional, HCA por wordo aplica na muchanan.

Abuso di mucha ta un violacion di derecho di mucha, y tin evidencia fuerte cu ta muestra e impacto emocional di comportacion cu ta keda afecta e mucha pa resto di su bida. E necesidad pa e investigacion aki a crece particularmente despues di e morto di dos ruman homber, di tres y cinco año, causa pa violencia y negligencia di e mayornan. E morto di e dos muchanan a spanta e comunidad di Aruba, cu a reacciona cu un demanda pa mehoracion di e servicionan di proteccion di mucha. E investigacion aki ta contribui na e datonan necesario pa yega na un mehoracion.

A encuesta un total di 895 muchanan di Aruba entre 12 pa 17 año usando e estudio nacional di Hulanda riba prevalencia di abuso di mucha como instrumento di midi. E resultadonan a muestra un prevalencia pa abuso durante henter bida di 78.4 por ciento y un prevalencia anual di 50.2 por ciento. Resultadonan ta revela, entre otro, cu na momento cu prevalencia di abuso ta aumenta, e cifranan pa capacidad humano tambe ta aumenta, representando e fayó di mucha pa disfruta di e habilidadnan necesario pa nan bienestar. E investigadonan ta recomenda pa replica e estudio aki den otro islanan den Caribe pa yega na un consenso pa desaroya e indice regional riba un sociedad amigabel pa mucha, esta e *Child Friendliness Index*. Otro recomendacion ta pa inclui

introduccion di HCA den educacion pa docente, psicologia, y programanan di entrenamiento pa trabou social den Caribe.